

Mid-Day Dogri News Bulletin 27- Feb. 2026

समां - 12:25 hrs.

<><><><><><>

**JMU Univ. Goonj**

जम्मू युनिवर्सिटी अज्जै थमां अपने बड़े मते महत्वै आहले बहु-शैली युवा उत्सव “गूंज” दे त्रीयें संस्करण दी मेजबानी करा रदी ऐ। उपराज्यपाल मनोज सिन्हा होर इस दंऊ रोजा कार्यक्रम दा उदघाटन करगंन। शिक्षण विभागें, सरबंधत कालजें ते आले-दोआले दे विश्वविद्यालयें दे तकरीबन 600 विद्यार्थी इस कार्यक्रम च हिस्सा लै रदे न। इस उत्सव च खेड्ड, सांस्कृतिक गतिविधियां ते होर दुए बेहतरीन प्रदर्शन कीते जागंन। विद्यार्थियें च पढ़ने दी आदत गी बढ़ावा देने लेई दुलर्भ ते बेहतरीन कताबें दी इक प्रदर्शनी बी लाई जा रदी ऐ।

<><><><><><>

**India-Pak UN**

भारत नै जिनेवा च लग्गे दे संयुक्त राष्ट्र मनुक्खी अधिकार कौंसल दे 61में इजलास च जम्मू-कश्मीर बारे कीती गेदी टिप्पणियें गी खारिज करदे होई पाकिस्तान गी करार जवाब दिता ऐ। 23 फरवरी थमां 31 मार्च तोड़ी चलने आहले इस इजलास च परते दे अपने अधिकार दा इस्तेमाल करदे होई जिनेवा च संयुक्त राष्ट्र च भारत दे स्थायी मिशन दियें प्रथम सचिव अनुपमा सिंह होरें आखेआ की जेकर जम्मू-कश्मीर च पिच्छले बरे चालू कीता गेदा दुनिया दा सबनें शा उच्चा चनाऽ रेल पुल फर्जी ऐ- तां पाकिस्तान दी बुद्धि भ्रष्ट

होई गेदी ऐ ते ओ सुखने दी दुनिया च रवा'रदा ऐ। उ'नें आखेआ जे जम्मू-कश्मीर च रिकार्ड गिनतरी च होए दा मतदान इस गल्लै दा सबूत ऐ जे लोकें आतंकवाद गी नकारी दिते दा ऐ ते ओ विकास-बाददे ते लोकतंत्र दी बतै पर तेजिया कन्नै अग्गे बदा करदे न। उ'नें आखेआ जे पाकिस्तान गी ए हजम नैई होआ करदा जे जम्मू-कश्मीर दा विकास बजट पाकिस्तान गी हाल च गै अंतराश्ट्रीय मुद्रा कोष थमां थोए दे बेल-आउट पैकेज थमां दूना ऐ- इस करियै पाकिस्तान बे-सिर-पैर दियां गल्लां करियै भारत दे खिलाफ झूठा प्रचार करा'रदा ऐ।



### **Mandaviya-JK Sports**

केन्द्रीय युवा मामले ते खेड्ड मंत्री मनसुख मांडविया होरें वीरवारें आखेआ जे जम्मू-कश्मीर च लोकें दी धारणा च बदलाव आवा'रदा ऐ। गुलमर्ग च “खेलो इंडिया स्यालू खेड्डें -2026” दे दुए गेड दे समापन समारोह च बोलदे होई मांडविया होरें आखेया जे इस समें च अशांति आहले इस इलाके गी हून खेड्ड आयोजनें ते नौजवानें दी शमूलियत कन्नै नमीं पंछान थहोआ रदी ऐ। उ'नें गलाया जे पैहले सुरक्षा सरबंधी मुद्दे पर ध्यान केन्द्रित करने आहले अखबारें च हून खेड्डें ते विकास गी उजागर कीता जा'रदा ऐ।



### **KIWG Results**

गुलमर्ग च आयोजित “खेलो इंडिया विंटर गेम्स-2026” दा 6मां संस्करण कल सम्पन्न होई गया। भारती फौज नै उप्परोतली त्रीयें बरे टीम प्रतियोगिता दा खिताब अपने नांs कीता। सुन्ने दे 9, चांदी दे 6 ते कैह दे 8 तगमें सनें कुल 23 तगमें हासल करियै सेना पैहली थाहरै पर रेही। हिमाचल प्रदेश दी टीम दुई थाहरै पर रेही ते उन्नै सुन्ने दे 6, चांदी दे 7 ते कैह दा 1 तगमें सनें कुल 14 तगमे लैते। एहदे मगरा हरियाणा त्रीये नम्बरै पर रेहा ते उसी कुल 7 तगमे हासल होए जिंदे च सुन्ने दे 4, चांदी दे 1 ते कैह दे 2 तगमे न। स्यालु खेड्डें दे इस संस्करण दे मेजबान जम्मू-कश्मीर नै 10मीं थाहर हासल करदे होई कुल 4 तगमे जिते- जिंदे च सुन्ने ते चांदी दा 1-1 तगमा ते कैह दे 2 तगमे शामिल न। लेह ते गुलमर्ग च करोआए गेदे इनें मुकाबलें च करीबन 900 खडारियें हिस्सा लैता।



### **Tulip Garden Poonch**

बन्ने आहले जिले पुंछ च पैहली बारी कृष्ण चंद्र पार्क च ट्यूलिप गार्डन खोलेआ गेआ। 2 कनाल शा मते रकबे च फैले दे इस ट्यूलिप गार्डन च 6 बक्ख-बक्ख किस्में ते रंगें आले ट्यूलिप लाए गेदे न- जेहड़े उत्थे औने आहलें लेई बड़ा दिलकश नज़रा पेश करा'रदे न। पुंछ दे ADC ताहिर मुस्तफा मलिक होरें इस ट्यूलिप गार्डन दा उदघाटन कीता ते इसी दिक्खने आस्तै राजौरी सनें होरनें गोआंडी जिलें थमां बी बड़ी बद्ध गिनतरी च लोक उत्थे पुज्जा करदे न। मकामी लोकें दा आखना ऐ जे एहदे कन्नै सैलसफा गी बड़ा मता बढ़ावा मिलोग ते अर्थबवस्था गी बी लाह हासल होग।



## **Prog. Announcement**

आकाशवाणी जम्मू दा क्षेत्रीय समाचार एकांश, कल यानि 28 फरवरी गी दपैहरी साङ्डे 12 बजे 'राश्ट्री विज्ञान दिवस' दे मौके पर 30एं मिंटे दी अवधि आहला इक खास कार्यक्रम प्रसारित करग। इस बशेश कार्यक्रम दा विशेषार होग "विज्ञान दे खेतर च महिलां विकसित भारत दी प्रेरणा"। इस बशेश कार्यक्रम च स्हाड़ियां परौहिनियां होडन- सी.एस.आई.आर-ट्रिपल आई.एम जम्मू दियां चीफ साइंटिस्ट डॉ. सुफला गुप्ता, जेहिड़ियां इस विशे पर अपने माहिराना बचार सांझे करडन।



## **Weather**

जम्मू-कश्मीर च वीरवारें बी तापमान सामान्य थमां उप्पर दर्ज कीता गया। कश्मीर घाटी दे बी मते सारे हिस्सें च तापमान 8 थमां 10 डिग्री सेल्यिस दर्ज कीता गेआ- जेड़ा के मौसम स्हाबें मता ऐ। आकाशवाणी जम्मू संवाददाता नै जानकारी दिती ऐ जे मौसम विभाग नै अज्जै आस्तै जम्मू-कश्मीर च मौसम आमतौरा पर खुश्क रौहने दी पेशनगोई कीती ऐ। 2 ते 3 मार्च गी किश थाहरें पर बद्दल घनोने ते हल्की बरखा या बर्फबरी दी मेद जताई गेदी ऐ। एदे मगरा 7 मार्च तोड़ी मौसम आमतौरा पर खुश्क रौहग।



## **Ranji Trophy**

रणजी ट्रॉफी दे फाईनल च कर्नाटक कन्नै खेडढे होई जम्मू-कश्मीर दी टीम नै 291 रन्ज दी बढत बनाई लैती ऐ। कर्नाटक दी टीम पैहली बारी च 293 रन्ज बनाई सकी। जम्मू-कश्मीर दे आकिब नबी नै 5 विकट लैते। जम्मू-कश्मीर दी टीम नै दुई पारी दी शुरुआत करी दिती ऐ। खीरी खबरां थोने तोड़ी जम्मू-कश्मीर दी टीम नै 2 विकटे दे नुक्सान पर 11 रन्ज बनाई लैते दे हे।



### **Mughal Road Reopens**

ऐतिहासिक मुगल रोड गी गड्डिये दी आवा-जाई लेई खोली दिता गया ऐ- जेदे कन्नै कश्मीर घाटी ते बन्ने कन्नै लग्गदे जिले राजौरी-पुंछ बश्कार सम्पर्क होर बेहतर होई गेआ। आकाशवाणी जम्मू संवाददाता नै जानकारी दिती ऐ जे एह सिड़क जेहड़ी शोपियां थमां पीर गी गली तोड़ी खुलनी तय ऐ- एहदे पर अज्जै थमां गड्डिये दी आओ-जाई परतिए ब्हाल करने दा फैसला मौसम गी मद्देनजर रक्खदे होई लैता गेआ ऐ। यात्रिये गी अपील कीती जंदी ऐ जे ओह ट्रैफिक पुलिस आसेआ जारी हिदायते दी पालमा करन।

